

Rosabelle Illes, na feria di buki na Sint Maarten:

“Mi kier conoce e storia di mi ancestroan y nos islanan bisiña”



ORANJESTAD – Recientemente, Rosabelle Illes kende ta un escritora local a bishita Sint Maarten pa feria di buki. E ta conta Bon Dia Aruba cu e kier logra conoce mas di su islanan bisiña y tradicionnan cu no ta mara na e colonisadonan di e region Caribe.

Illes ta bisa “E cos ta e ta dificil pa bo pinpoint nan cultura, na Sint Maarten. Pa motibo cu e poblacion ta asina mescla, e ta creando un identidad di su mes. Den e sentido ey nan identidad ta mas cerca di ta puro dor cu e ta consisti di diferente cos, e ta algo ironico y fascinante. Y pa mi actualmente mi enfoka ta conoce mi region, conoce e islanan den Caribe, na scol nan no a siña mi di mi bisiña nan, nan a



siña mi den e colonisadonan, pero mientrastanto nos mes como islanan a crea nos propio cultura, arte, tradicionnan y identidad cu no ta mara na e colonisadonan. Esey ami ta interesa den dje, esey mi kier sa mas di dje, con cada isla ta riba nan mes y con similar nos ta den e region, mi ta sinti cu nos tin cu hala mas cerca di otro como un region Caribense”.

E festival

E di 13 edicion anual di feria di buki di St. Maarten a tuma luga 2 pa 6 di juni ultimo. Pa e evento aki, co-fundador di e feria di buki y escritor destaca den Caribe, sr. Lasana M.

Sekou, a acerca e hoben autor di Aruba, Rosabelle Illes, pa participa como un di e autor nan invita. Despues di a mira videonan di Illes recitando su poesia ariba YouTube, Sekou a keda impresiona cu su talento y a desea pa Illes introduci su trabou na e isla di St. Maarten.

Illes su prome presentacion tawata na e “Poet’s Lounge Open Mic Night”, un evento mensual organisa pa e compania Ki SXM. Ariba e anochi aki, Illes hunto cu Fola Gadget (poeta, rapper y educador di Guadeloupe) tawata invitadonan special pa comparti nan trabou cu escritornan local. Ki SXM a considera e open mic night uno exitoso, generando un di e publiconan mas grandi cu e evento a mira.

Escritornan

Banda di comparti cu escritornan local di Sint Maarten, Illes a ricibi e oportunidad di presenta su trabou hunto cu autornan internacional. Ariba un anochi literario, 18 escritor a keda selecta pa declama poemanan of lesa parti di un storia durante un cena exclusivo. Entre nan, Oonya Kempadoo (Guyana/Grenada) a lesa parti di su ultimo novela titula “All decent animals”, cu a ricibi posicion number 6 ariba e lista prestigioso di Oprah Winfrey su O Maga-



zine summer reads. “Ta un honor pa comparti e escenario cu autornan manera Oonya, cu ta origina for di e mesun region cu mi y cu a sigui residencia den e mesun region cu mi, pero cu ta exitoso internacionalmente, esey ta un fuente grandi di motivacion pa mi”, Illes a expresa.

E feria di buki a continua cu diferente sesion di discusion, tayer, lectura y oportunidad pa intercambia ideanan. Ora Illes a wordo puntra cua sesion el a gusta mas el a pone enfasis ariba e tayer di skirbimento presenta pa Tishani Doshi. Doshi ta un escritora y bailarina di India cu a ricibi premionan significante pa su trabou. Segun Illes “e manera

con Tishani ta composita su frasenan ta fascinante. E ta scoce cada palabra cu hopi cautela y e ta yena su frasenan, pues su frasenan ta pisa. E consehonan cu el a duna nos a resona den mi y mi a descubri mi siguiente paso pa cu mi propio skirbimento”.

Illes ta e autor di dos coleccion di poesia “Beyond Insanity” y “Spiel di mi Alma”. Su storianan cortico a keda publica den revistanan literario internacional manera Crack the Spine (Mississippi), the NewerYork Press (California) y Susumba’a Book Bag (Jamaica). Actualmente Illes ta trahando ariba un buki di mucha cu el a skirbi hunto cu musico di Corsou Levi Silvanie. □

